

L'innamurati dolci beati, ùn ponu micca induvinà
Chì a furtuna ùn hè chè una, a chì a piglia à ch'ùn ne hà
Chì una stella luce per elli, di u so splendore eternità
Chì a furtuna hè cum'a luna, scarsa à chì a pò spiccà

È si fanu un castellu, ma induv'ellu hè u purtellu, ùn ci hè nimu chì a sà
Un amore furtezza, un nidu di bellezza, per pudè sunnià
Locu per ellu è ella eterna cittadella, chì nimu ùn pò piglià
È noi stemu fora chì ci manca lu core, di pudelli scuncià

Quand'elli sò sebbiati tutti l'innamurati, cercanu à piattà
U soiu lu tesoru preziosu cum'è l'oru, chì ci vole accantà
Per li ghjorni di fame ed ogni lindumane, chì pò vene à passà
A sanu chì l'amore frollu cum'è u fiore, si pò ancu sicca

Legne da parte pè i ghjorni cutrati, stonde incerte in core di l'invernu
Focu chì scalda i so cori piattati, è chì spampilla aspettendu u veranu

L'innamurati sò furtunati, quessa tuttu mondu a sà
È d'esse belli cume elli, ne simu tutti à sunnià
Truvà a stella mezu à u celu, quella chì ci cunvenerà
Circà furtuna, spiccà la luna, tuttu lu mondu a pò pruvà

È pò fà un barcellu, pè parte cume elli, in mare à navigà
Fà una barca lesta, ùn teme la timpesta, è ch'ùn s'affunderà
È di sta navicella, stende tutta la vela, ch'u ventu piglierà
Per purtà ci luntanu, nant'à quellu uceanu, d'amore immensità

Circà una pianetta, una terra diserta, pè pudè ci campà
Un locu favulosu, secretu è nascosu, chì nimu ùn truverà
Un'ìsula virdura, salva di la natura, duve si puderà
Truvà l'eternu amore, chì riscalda u core, è ci face cantà
Truvà l'eternu amore, chì riscalda u core, è ci face cantà